

四庫全書

集部

欽定四庫全書

石倉歷代詩選卷六十五

明 曹學佺 編

中唐十九

于鵠

長安人
隱居漢陽

寄盧儼員外秋衣詞

寄遠空以心心誠亦難知
篋中有秋帛裁作遠客衣
縫製雖女功尺度手自持
容貌常目中長短不復疑
斜縫

密且堅遊客多塵緇意欲都無言澣濯耐歲時殷勤託
行人傳語慎勿遺別來已年老亦聞鬢成絲縱然更相
逢握手惟是悲所寄莫復棄願見長相思

秦越人洞中詠

扁鵲得仙處傳是西南峰年年山下人長見騎白龍洞
門黑無底日夜惟雷風清齋將入時戴花兼抱松石逕
陰且寒地響知遠鐘似行山林外聞葉屐聲重低礙更
俯身漸遠晝夜同時時白蝙蝠飛入茅衣中行以路轉

窄足下水淙淙但願逢一人自得朝天宮

宿西山修下元齋咏

幽人在何處松檜深冥冥西峰望紫雲知有安期生沐
浴溪水暖新衣禮仙名碧紗籠寒燈長幡綴金鈴林下
聽法侶起踐枯葉聲焚香開卷時照耀金室明投簡石
洞裏稱遇上帝靈學道能苦心自古無不成

入白芝溪尋黃尊師

觸煙入溪口茫茫惟檉檉其中飛碧流十里不通屐出

林尚未明細徑懸峭壁把藤借行勢混入猿猱跡忽然
風景異乃到神仙宅天晴茅屋頂殘雪蒸氣白陽窓梳
髮聲久立聞吹幘抱琴出門來不顧人間客山院不洒
掃四時自虛寂落葉埋長松出地纔數尺曾讀上清經
去注長生籍願示不死方何山有瓊液

過凌霄巖謁張先生祠

落落萬峰裏一峰獨凌天下看如尖高上有十里泉至
人愛幽深一住五十年懸牘到其上乘牛耕藥田衣食

不下求乃是雲中仙山僧獨知處相引衝碧煙斷崖晝
昏黑搓臬橫雙椽面壁攀石稜養力方敢前累歇日初
沒始到茅堂邊見客不問誰禮質無周旋醉臥枕欹樹
寒坐展青氊折松掃藜牀秋菓顏色鮮白犬舐客衣驚
走聞腥膻乃知軒冕徒寧比雲壑眠

古挽歌

雙轍出郭門綿綿東西道送死多於生幾人得終老見
此切肺肝不如歸山好不聞哀哭聲默默安懷抱時盡

從物化又免生憂擾世間壽者稀盡為悲傷惱

又

送哭誰家車靈旛紫帶長青童抱何物明月與香囊可
惜羅衣色看昇入水泉莫憂埏道暗燒漆得千年

贈蘭若僧

一身禪誦苦洒掃古花宮靜室雲常閉層蘿月不通懸
燈喬木上鳴磬亂幡中附入高僧傳應隨慧遠公

題柏臺山僧

上方惟一室禪定對山容行道臨孤壁持齋聽遠鐘
枯藤離舊樹朽石落危峰不向雲間見高踪豈易逢

夜會李太守宅

郡齋常夜掃不寐獨吟詩把燭迎幽客升堂戴接離
微風吹淡醕餘雪落寒枝明日逢山伴須令隱者知

題宇文哀山寺讀書院

讀書林下寺不出動經年草閣連僧院山厨共石泉
雲庭無履跡龕壁有燈煙年少今頭白刪詩到幾篇

山中自述

三十無名客空山獨卧秋病多知藥性年長信人愁螢
影竹窻下松聲茅屋頭近來心更靜不夢世間遊

山中寄章鉦

懶成身病日因醉卧多時送客出谿少讀書終卷遲幽
窻聞墜葉晴景見遊絲早晚來收藥門前有紫芝

南谿書齋

茅屋住來久山深不置門草生垂井口花落擁籬根入

院將雛鳥尋蘿抱子猿曾聞異人說風景似桃源

宿王尊師隱居

夜愛雲林好寒天月裏行青牛眠樹影白犬吠猿聲一
磬山院靜千燈谿路明從來此峰客幾箇得長生

哭凌霄山光上人

身沒碧峰裏門人改葬期買山尋主遠壘塔化人遲鬼
火穿空院秋螢入素帷黃昏溪路上聞哭竺乾師

送韋判官歸薊門

桑乾歸路遠聞說亦愁人有雪常經夏無花空到春帶
煙雲外火牧馬月中塵白首從戎客青衫未離身

出塞

蔥嶺秋塵去全軍取月支山川引行陣蕃漢列旌旗轉
戰疲兵少孤城外救遲邊人逢聖代不見偃戈時

送張司直入單于

若過并州北誰人不憶家塞深無伴侶路盡有平沙磧
冷惟逢雁天春不見花莫隨征將意垂老事輕車

遊瀑泉寺

日斜尋未遍古木寺高低碧澗皆分瀑朱樓尚隔溪廚
窓通石鼠殿跡立山雞更有無人處明朝獨向西

尋李逸人舊居

舊隱松林下衝泉入兩涯琴書隨弟子雞犬在鄰家茅
屋長黃菌槿籬生白花幽墳無處訪恐是入煙霞

送李明府歸別業

寄家丹水邊歸去種春田白髮無知己青山有宿緣鹿

裘長酒氣茅屋有茶烟亦擬辭人世前溪近瀑泉

過張老園林

身老無修飾頭巾岼白紗開門朝掃逕輦水夜澆花藥
氣聞深巷桐陰到數家不愁還酒債腰下有丹砂

題樹下禪僧

久行多不定樹下是禪牀寂寂心無住年年日自長
蛇同宿澗草木共經霜已見南人說天台有舊房

題服柏先生

服柏不飛鍊閒眠閉草堂有泉惟盥漱留火為焚香片
雨重門靜孤桐滿院涼仍聞枕中術曾授漢淮王

惜花

夜來花欲盡始惜兩三枝早起尋稀處閒眠憶落時
藥飄蜂自散蒂折蝶還移更與殷勤別明春及早期

公子行

少年初拜大長秋半醉垂鞭見列侯馬上抱雞三市鬪
袖中攜劍五陵遊玉簫金管迎歸院錦袖紅妝擁上樓

更向苑西新買宅月波春水入門流

送唐大夫讓節歸山

年老功成乞罷兵玉階匍匐進雙旌
朱門駕瓦為仙觀白領狐裘出帝城
侍女休梳宮樣髻蕃童新改道家名
到時浸髮春泉裏却夢紅樓簫管聲

古詞

素絲帶金地窻間掬飛塵偷得鳳凰釵
門前乞行人

古挽歌

陰風吹黃蒿挽歌渡秋水車馬却歸城孤墳月明裏

寄周憚

家在荒陂長似秋蓼花芹葉水蟲幽去年相伴尋山客
明月今宵何處遊

登古城

獨上閒城却下遲秋山慘慘塚累累當時還有登城者
荒草如今知是誰

題美人

秦女窺人不解羞攀花趁蝶出牆頭胸前空帶宜男草
嫁得蕭郎愛遠遊

贈碧玉

新繡籠裙豈惹花路人笑上返金車霓裳禁曲無人解
暗問梨園弟子家

題合溪乾洞

渡水傍山尋絕壁白雲飛處洞天開仙人來往行無跡
石逕春風長綠苔

江南曲

偶向江邊採白蘋
還隨女伴賽江神
衆中不敢分明語
暗擲金錢卜遠人

巴女謠

巴女騎牛唱竹枝
藕絲菱葉傍江時
不愁日暮還家錯
記得芭蕉出槿籬

別齊太守

花裏高樓春夜寒
還如玉屋上天壇
歸山不道無明月

誰共相從到晚看

襄陽看花

時因小
蠻作

自小看花長不足江邊尋得數株紅
黃昏人散東風冷
吹落誰家明月中

戴叔倫

字幼公
潤州人

南野

治田長山下引流坦溪曲東山有遺塋
南野起新築家
世素業儒子孫鄙食祿披雲朝出耕
帶月夜歸讀身勸

竟亡疲團團欣在目野芳綠可採泉美清可掬茂樹延
晚涼早田候秋熟茶烹松火紅酒吸荷杯綠解佩臨清
池撫琴看修竹此懷誰與同此樂君所獨

曾遊

泊舟古城下高閣快登眺大江會彭蠡羣峰豁玄嶠清
影涵空明黛色凝遠照碑留太史書詞刻長公調絕粒
感楚囚丹衷猶照耀懷哉不可招凭欄一悲嘯

江行

漾舟晴川裏掛席候風生臨泛何容與愛此江水清蘆
洲隱遙嶂霧日映孤城自顧踈野性屢忘鷗鳥情聊復
與時乖暫欲解塵纓驅馳非吾願虛懷浩已盈

感懷二首

主人飲君酒勸君弗相違但當盡歡量觴至無復辭人
生百年中會合能幾時不見枝上花昨滿今漸稀花落
還再開人老無少期古來賢達士飲酒不復疑

尺帛無長裁淺水無長流水淺易成枯帛短誰人收人

生取舍間趨競固非優舊交跡雖疎中心自云稠新交
意雖密中道生怨尤踟蹰復踟蹰世路今悠悠

喜病

閒居倦時燠開軒俯平林雷聲殷遙空雲氣布層陰川
上風雨來灑然滌煩襟田家共歡笑溝澮亦已深團團
聚鄰曲斗酒相與斟樵歌野曲中漁釣滄江潄蒼天暨
有念悠悠終我心

孤鴻篇

江上雙飛鴻飲啄行相隨朔風一何厲中道傷其雌顧
影明月下哀鳴聲正悲已無矰繳患豈乏稻梁資嗚嗚
慕儔匹遠集清江湄中有孤文鶴翩翩好容儀共欣相
知遇畢志同棲遲野田鳴鷄鳥相妒復相疑鴻鵠不汝
較奮翼起高飛焉隨腐鼠欲辜此雲霄期

女耕田行

乳燕入巢笋成竹誰家二女種新穀無人無牛不及犁
持刀斫地翻作泥自言家貧母年老長兄從軍未娶嫂

去年災歿牛困空截絹買刀都市中頭巾掩面畏人識
以刀代牛誰與同姊妹相攜心正苦不見路人惟見土
䟽通畦壟防亂田整頓溝塍待時雨日正南岡下餉歸
可憐朝雉擾驚飛東林西舍花發盡共惜餘芳淚滿衣

屯田詞

春來耕田遍砂磧老稚欣欣種禾麥麥苗漸長天苦晴
土乾确确鋤不得新禾未熟飛蝗生青苗食盡餘枯莖
捕蝗歸來守空屋囊無寸帛餅無粟十月移屯來向城

官教去伐南山木
驅牛駕車入山去
霜重草枯牛凍死
艱辛歷盡誰得知
望斷天南淚如雨

相思曲

高樓重重閉明月
腸斷他年隔山別
紫簫橫笛寂無聲
獨向瑤窻坐愁絕
魚沈雁杳天涯路
始信人間別離苦
恨滿牙牀翡翠衾
怨折金釵鳳凰股
井深轆轤嗟綆短
衣帶相思日應緩
將刀斫水水復連
揮刀割情情不斷
落花亂逐東流水
一點芳心為君死
妾身願作巫山雲

飛入仙郎夢魂裏

柳花歌送客往桂陽

滄浪渡頭柳花發
斷續因風飛不絕
搖煙拂水積翠間
綴雪含霜誰忍攀
夾岬紛紛送君去
鳴棹孤尋到何處
移家深入桂水源
種柳新成花更繁
定知別後消散盡
却憶今朝傷旅魂

邊城曲

人生莫作遠行客
遠行莫戍黃沙磧
黃沙磧下八月時

霜風裂膚百草衰塵沙晴天迷道路河水悠悠向東去
胡笳聽徹雙淚流行人慘慘生邊愁原頭獵犬夜相向
馬蹄蹴蹋層冰上不似京華俠少年青歌妙舞落花前

巫山高

巫山峨峨高插天危峰十二凌紫煙瞿塘嘈嘈急如絃
洄流逆浪將覆船雲梯豈可進百丈那能牽陸行巉巖
水不前洒淚向流水淚歸東海邊含愁對明月明月空
自圓故鄉回首思綿綿側身天地心茫然

早春曲

青樓昨夜東風轉錦帳凝寒覺春淺垂楊搖絲鶯亂啼
裊裊煙光不堪剪博山吹雲龍腦香銅壺滴愁更漏長
玉頰啼紅夢初醒羞見青鸞鏡中影儂家少年愛遊逸
萬里輪蹄去無跡朱顏未衰消息稀腸斷天涯草空碧

白苧詞

館娃宮中露華冷月落啼鴉散金井吳王扶頭酒初醒
秉燭張筵樂清景美人不眠憐夜永起舞亭亭亂花影

新裁白苧勝紅綃玉珮珠纓金步搖回鶯轉鳳意自嬌
銀箏錦瑟聲相調君恩如水流不斷但願年年同此宵
東風吹花落庭樹春色催人等閒去大家為歡莫延佇
頃刻銅龍報天曙

客夜與故人偶集

天秋月又滿城闕夜千重還作江南會翻疑夢裏逢風
枝驚暗鵲露草覆寒蛩羈旅常堪坐相留畏曉鐘

雨

歷歷愁心亂迢迢獨夜長
春帆江上雨曉鏡髮邊霜
啼鳥雲山靜落花溪水香
家人亦念我與汝黯相忘

過賈誼宅

一謫長沙地三年嘆逐臣
上書憂漢室作賦弔靈均
舊宅荒秋草西風薦客蘋
淒涼回首處不見洛陽人

送郎士元

自髮金陵客懷歸不暫留
交情分兩地行色載孤舟
黃葉蟬吟晚滄江雁送秋
何年重過此詩酒復追遊

山居即事

巖雲掩竹扉去鳥帶餘暉地僻生涯薄山深俗事稀
養花分宿雨剪葉補秋衣野渡逢漁子同舟蕩月歸

山行

山行分曙色一路見人稀野鳥啼還歇林花墮不飛
雲迷棲鶴寺水澁釣魚磯回首天將暝逢僧話未歸

送耿十三漳復往遼海

仗劍萬里去孤城遼海東旌旗愁落日鼓角壯悲風
野

迥邊城小烽消戍壘空
轅門正休暇投策拜元戎

宿天竺寺晚發羅源

黃昏投古寺深院一燈明
水砌長杉列風廊敗葉鳴
山雲留別偈王事速歸程
迢遞羅源路輕輿候曉行

江上別劉駕

天涯芳草遍江路又逢春
海月留人醉山花笑客貧
離杯傾祖帳別騎逐行塵
回首風流地登臨少一人

南軒

野居何處是軒外一橫塘
座納薰風細簾垂白日長
面山如對畫臨水坐流觴
更愛閒花木欣欣得向陽

送別錢起

陽關多古調無奈醉中間
歸夢吳山遠離情楚水分
孤舟經暮雨征路入秋雲
後夜同明月山窗定憶君

送張南史

陋巷無車轍煙蘿總是春
賈生猶未達原憲竟忘貧
草座留山月荷衣遠洛塵
最憐知己在林下訪閒人

春日早朝應制

仙仗肅朝官承平聖主歡
月沉宮漏靜雨濕禁花寒
丹荔來金闕朱櫻貢玉盤
六龍扶御日只許近臣看

早行寄朱放

山曉旅人去天高秋氣悲
明河川上沒野草露中衰
此別又千里少年能幾時
心知剡溪路聊且寄前期

除夜宿石頭驛

旅館誰相問寒燈獨可親
一年將盡夜萬里未歸人
寥

落悲前事，支離笑此身。愁顏與衰髮，明日又逢春。

吳明府自遠而來留宿

出門逢故友，衣服滿塵埃。歲月不可問，山川何處來。綺
城容敝宅，散職寄靈臺。自此留君醉，相歡得幾回。

送友人東歸

萬里楊柳色，出關送故人。輕煙拂流水，落日照行塵。積
夢江湖濶，憶家兄弟貧。徘徊灞亭上，不語自傷春。

遊少林寺

步入招提路因之訪道林石龕苔蘚積香徑白雲深雙
樹含秋色孤峰起夕陰屨廊行欲遍皓首一長吟

春日訪山人

遠訪山中客分泉漫煮茶相攜林下坐共惜鬢邊華歸
路逢殘雨沿溪見落花候門童子問遊樂到誰家

留宿羅源西峰寺示輝上人

一宿西峰寺塵煩暫覺清遠林生夕籟高閣起鐘聲山
寂僧初定廊深火自明雖云殊出處聊與說無生

寄司空曙

細雨柴門生遠愁
向來詩句若為酬
林花落處頻中酒
海燕飛時獨倚樓
北郭晚晴山更遠
南塘春盡水爭流
可能相別還相憶
莫遣楊花笑白頭

過友人陳羽山居

向來攜酒共追攀
此日看雲獨未還
不見山中人半載
依然松下屋三間
峰攢仙境丹霞上
水逸漁磯綠玉灣
却望夏洋懷二妙
滿崖霜樹曉斑斑

寄劉禹錫

謝相園西石徑斜，知君習隱暫為家。
有時出郭行芳草，長日臨池看落花。
春去能忘詩共賦，客來應是酒頻賒。
五年不見西山色，悵望浮雲隱落霞。

漢宮人入道

蕭蕭白髮出宮門，羽服星冠道意存。
霄漢九重辭鳳闕，雲山何處訪桃源。
瑤池醉月勞仙夢，玉輦乘春却帝恩。
回首吹簫天上伴，上陽花落共誰言。

二靈寺守歲

守歲山房迥絕緣
燈光香茗共蕭然
無人更獻椒花頌
有客同參柏子禪
已悟化城非樂界
不知今夕是何年
憂心悄悄渾忘寐
坐待扶桑日麗天

弔暢當

萬里江南一布衣
早將佳句動京畿
徒聞子敬遺琴在
不見相如驛馬歸
朔雪恐迷新塚草
秋風愁老故山薇
玉堂知己能銘述
猶得精魂慰所依

寄孟東野

亂餘城郭畏經過到處閒門長薜蘿
用世空悲聞道淺入山偏喜識僧多
醉歸花徑雲生履樵罷松巖雪滿蓑
石上幽期春又暮何時載酒聽高歌

過賈誼舊居

楚鄉卑濕嘆殊方作賦人稀宅已荒
謾有長書憂漢室空將哀賦弔沅湘
雨餘古井生秋草葉盡疎林見夕陽
過客不須頻太息咸陽宮殿亦淒涼

宮詞

紫禁迢迢宮漏鳴夜深無語獨含情
春風鸞鏡愁中影
明月羊車夢裏聲
塵暗玉階綦跡斷
香飄金屋篆煙清
貞心一任蛾眉妬
買賦何須問馬卿

暮春感懷舊二首

杜宇聲聲喚客愁
故園何處此登樓
落花飛絮成春夢
剝水殘山異昔游
歌扇多情明月在
舞衣無主綵雲收
東皇去後韶華盡
老圃寒香別自秋

四十無聞懶漫身
旅情丘壑任天真
悠悠往事杯中物
赫赫時名扇外塵
短策看雲松寺晚
踈簾聽雨草堂春
山花水鳥皆知已
百遍相過不厭貧

宿無可上人房

偶來人境外
何處染鴛塵
倘許栖林下
僧中老此身

贈李唐山人

此意靜無事
閉門風景遲
柳條將白髮
相對共垂絲

三閭廟

沅湘流不盡屈子怨何深日暮秋風起蕭蕭楓樹林

送王司直

西塞雲山遠東風道路長人心勝潮水相送過潯陽

隄上柳

垂柳萬條絲春來織別離行人攀折處閨妾斷腸時

夜坐

夜靜河漢高獨坐庭前月忽起故園思動作經年別

對月荅元明府

山下孤城月上遲
相留一醉本無期
明年此夕遊何處
縱有秋光知對誰

湘南卽事

盧橘花開楓葉衰
出門何處望京師
沅湘日夜東流去
不為愁人住少時

題友人山居

四郭青山處處同
客懷無計荅秋風
數家茅屋清溪上
千樹蟬聲落日中

過柳溪道院

溪上誰家掩竹扉
鳥啼渾似惜春暉
日斜深巷無人跡
時見梨花幾片飛

蘇溪亭

蘇溪亭上草漫漫
誰倚東風十二闌
燕子不歸春事晚
一汀烟雨杏花寒

贈鶴林上人

日日澗邊尋茯苓
崑扉長掩鳳山青
歸來掛衲高林下

自剪芭蕉寫佛經

昭君詞

漢家宮闕夢中歸
幾度羶房淚濕衣
惆悵不如邊雁影
秋風猶得向南飛

織女詞

鳳梭停織鵲無音
夢憶仙郎夜夜心
難得相逢容易別
銀河爭似妾愁深

春怨

金鴨香消易斷魂
梨花春雨掩重門
欲知別後相思意
回看羅衣漬淚痕

別鄭谷

朝陽齋前桃李樹
手栽清蔭接比鄰
明年此地看花發
愁向東風憶故人

題稚川山水

松下茅亭五月涼
汀沙雲樹晚蒼蒼
行人無限秋風思
隔水青山似故鄉

閒思

伯勞東去鶴西還
雲總無心亦度山
何似嚴陵灘上客
一竿長伴白鷗閒

閨怨

看花無語淚如傾
多少春風怨別情
不識玉門關外路
夢中連夜到邊城

石倉歷代詩選卷六十五

欽定四庫全書

石倉歷代詩選卷六十六

明 曹學佺 編

中唐二十

權德輿

字載之

與沈十九拾遺同遊栖霞寺上方夜於亮上人

院會宿

攝山標勝絕暇日諧想矚縈紆松路深繚繞雲巖曲重

樓迴樹杪古像鑿山腹人遠水木清地深蘭桂馥層臺
聳金碧絕頂摩淨綠下界誠可悲南朝紛在目焚香入
古殿待月出深竹稍覺天籟清自傷人世促宗雷此相
遇偃放隨所欲清論月輪低閒吟茗花熟一生如土梗
萬慮相桎梏永願事潛師窮年此棲宿

竹徑偶作

退朝此休沐閉戶無塵氛支策入幽徑清風隨此君琴
觴恣偃傲蘭蕙相氛氳幽賞方自適林西煙景曛

嚴陵釣臺下作

絕頂聳蒼翠清湍石磷磷先生晦其中天子不得臣心
靈棲顥氣纓冕猶緇塵不樂禁中卧却歸江上春潛驅
東海風日使薄者醇焉用佐天子持此報故人則知大
賢心不獨私其身弛張有深致耕釣陶天真奈何清風
後擾擾論屈伸交情同市道利欲相紛綸我行訪遺臺
仰古懷逸民矰繳鴻鵠遠雪霜松桂新江流去不窮山
色凌秋旻人世自今古清輝照無垠

感寓

殘雨倦歌枕病中時序分寒蟲與秋葉一夜隔窓聞
虛室對搖落晤言無與羣冥心試觀化世故自棼棼但看
鳶戾天豈見山出雲一歌徒擊節朱絃猶南薰倚梧秀
朝陽上有威鳳文終待九成奏來儀瑞吾君

浩歌

杖策出蓬葦浩歌愁思長北風吹荷衣蕭颯景氣涼通
達抵山郭里巷連湖光孤雲淨遠峰綠水溢方塘魚鳥

樂天性雜英互芬芳我心獨何為萬慮縈中腸履道身
未泰主家謀不臧心為世教牽跡寄翰墨場出處兩未
定羈旅空自傷沉憂不可裁佇立河之梁晚歸茅簷下
左右陳壺觴獨酌無長謠放心遊八荒得喪同一域是
非亦何常胡為苦此生仡仡徒自強乃泛杯中物可令
憂患亡因茲謝時輩棲息無何鄉

奉和聖製重陽日中外同歡以詩言志

五醴宴嘉節拜恩歡有餘煌煌菊花秀馥馥萸房舒白

露秋稼熟清風天籟虛和聲度簫韶瑞氣深儲胥百辟
皆醉止萬方今晏如宸衷在化成藻思煥瓊琚微臣徒
竊抃豈足歌唐虞

酬別蔡十二見贈

伊人茂天爵恬澹卧郊園傲世方隱几說經久顓門浩
歌曳柴車詎羨丹轂尊嚴霜被鶉衣不知狐白溫游心
義文際愛我相討論潢汙忽朝宗傳騎令載奔崢嶸歲
陰晚愀愴離念繁別館絲桐清寒郊煙雨昏中飲見逸

氣縱談窮化元佇看公車起聖代方乞言

送信安劉少府

相看結離思盡此杯中醪夷代輕遠遊上才隨薄祿
參卿等孫楚隱市同梅福吏散時泛絃賓來閑覆局襟情
無俗慮談笑成逸躅此路足灘聲羨君水涯宿

送人使之江陵

嘉招不辭避捧檄利攸往行役念前程讌遊睽舊賞征
軺星乍動江信潮應上煙水飛一帆霜風搖五兩紛紛

別袂舉切切離鴻響後會杳何時悠然勞夢想

送韋中丞奉使新羅

淳化洽聲明殊方均惠養計書重譯至錫命雙旌往星
辭北極遙水泛東溟廣斗柄辨宵程天琛宜晝賞孤光
洲島迴淨綠煙霞敞展禮盛賓從交歡覲君長經途勞
視聽愴別縈夢想延頸旬歲期新恩在歸鞅

奉使宜春夜渡新淦江陸路至黃蘗館路上遇

風雨作

草草理夜裝涉江又登陸望路殊未窮指期今已促傳
呼戒馭人振轡轉林麓陰雲擁巖端霈雨當山腹震雷
如在耳飛電來照目獸跡不敢窺馬蹄惟務速度心苦
齋禱濡體如沐浴萬竅相怒號百泉暗奔瀑危梁慮足
跌峻坂憂車覆問我何以然前日受微祿轉知人代事
纓組乃微束向若家居時安枕春夢熟遵途稍已近候
吏來相續曉霽心始安林端見初旭

晚渡楊子江却寄江南親故

返照滿寒流輕舟任搖漾支願見千里煙景非一狀遠
岫有無中片帆風水上天清去鳥滅浦迥寒沙漲樹晚
疊秋嵐江空翻宿浪胸中千萬慮對此殊清曠回首碧
雲深佳人不可望

古意

家人強進酒酒復能忘情持杯未飲時衆感紛已盈明
月照我傍庭柯振秋聲空階白露下枕席涼風生所思
萬里餘水濶山縱橫佳期憑夢想未晚愁雞鳴願得一

心人當年歡樂并長筵映玉組素指彈秦箏曠睇呈巧
笑惠音激淒清此願良未果永懷空如醒

早發杭州泛富春江寄陸三十六公祐

候曉起徒馭春江多好風白波連青雲蕩漾晨光中四
望浩無際沈憂將此同未離奔走途但恐成悲翁俯視
觸餌鱗仰目凌霄鴻纓塵日已厚心累何時空泛泛此
人世所向皆樊籠惟應杯中物醒醉等窮通故人玄圃
姿瓊樹分青葱終當入山去共結蘭桂叢

寄侍御從舅

靡靡南軒蕙迎風轉芬滋落落幽澗松百尺無附杖世
物自多故達人心不羈偶陳幕中畫永負林間期感恩
從慰薦循性難執紼維野鶴無俗質孤雲多異姿清冷松
露泣照灼巖花遲終賞稅塵駕來就東山嬉

月夜江行

扣舷不能寐浩露清衣襟彌傷孤舟夜遠結萬里心幽
興惜瑤草素懷寄鳴琴三奏月初上寂寥寒江深

雜詩

淇水春正綠上宮蘭葉齊
光風兩搖蕩鳴珮出中閨
一顧掇黃流千金呈瓠犀
徒然路傍子恍恍復悽悽

豐城劔池驛

龍劔昔未發泥沙相晦藏
向非張茂先孰辨斗牛光
神物不自達賢聖亦徬徨
我行豐城野忼慨心內傷

放歌行

夕陽不駐東流急榮名貴在當年立
青春虛度無所成

白首銜悲亦何及拂衣命駕出東山君臣道合俄頃間
一言一笑玉墀上變化生涯如等閒朱門杳杳列華戟
坐中皆是王侯客鳴環動佩暗珊珊駸馬花驄白玉鞍
十千斗酒不知貴半醉留賓邀盡歡銀燭煌煌夜將久
侍婢金壘瀉春酒春酒盛來琥珀光暗聞蘭麝幾般香
乍看皓腕暎羅袖微聽清歌發杏梁雙鬟美人君不見
一一皆勝趙飛燕迎杯乍舉石榴裙勻粉時交合歡扇
未央鐘漏醉中聞聯騎朝天曙色分雙闕煙雲遙靄靄

五衢車馬亂紛紛
罷朝鳴佩驟歸鞍
今日還同昨日歡
歲歲年年恣游讌
出門滿路光輝遍
一身自樂何足言
九族為榮真可羨
男兒稱意須及時
閉門下帷人不知
年光看逐轉蓬盡
徒詠東山招隱詩

妾薄命篇

昔住邯鄲年尚少
祇是嬌羞弄花鳥
青樓碧紗大道邊
綠楊日暮風裊裊
嬋娟玉貌二八餘
自矜顏色花不如
麗質全勝秦氏女
藁砧寧用專城居
歲去年來年漸長

青蛾紅粉全堪賞
玉樓珠箔但閒居
南陌東城詎來往
韶光日日看漸遲
標梅既落行有時
寧知燕趙娉婷子
翻嫁幽并遊俠兒
年年結束青絲騎
出門一去何時至
秋月空懸翡翠簾
春帷懶卧鴛鴦被
沙塞經時不寄書
深閨愁獨意何如
花前拭淚情無限
月下調絃恨有餘
離別苦多相見少
洞房愁夢何時曉
閒看雙鷺淚霏霏
靜對空牀魂悄悄
鏡裏紅顏不自禁
陌頭香騎動春心
為問佳期早晚是
人人總解有黃金

錫杖歌送明楚上人歸佛川

上人遠自西天至頭陀行遍南朝寺口翻貝葉古字經
手持金策聲泠泠護法護身惟振錫石瀨雲溪深寂寂
乍來松徑風露寒遙暎霜天月成魄後夜空山禪誦時
寥寥掛在枯樹枝真法常傳心不住東西南北隨緣路
佛川此去何時迴應真莫便游天台

古樂府

光風淡蕩百花吐樓上朝朝學歌舞身年二八壻侍中

幼妹承恩兄尚主綠窻珠箔繡鴛鴦侍婢先焚百和香
鶯啼日出不知曙寂寂羅幃春夢長

秋閨月

三五二八光如練海上天涯人共見不知何處玉樓前
乍入深閨玳瑁筵露濃香徑和愁坐風動羅帷照獨眠
初卷珠簾看不足斜抱瑩篔未成曲稍映妝臺臨綺窻
遙知不語淚雙雙此時愁望知何極萬里秋天同一色
靄靄遙分陌上光迢迢對此閨中憶早晚歸來歡燕同

可憐歌吹月明中
此夜不堪腸斷絕
願隨流影到遼東

送韋行軍員外赴河陽

五年武弁侍明光
輟佐中權拜外郎
記事還同楚倚相

傳經遠自漢扶陽
離堂處處羅簪組
東望河橋壯鞞鼓

三城曉角啓轅門
一縣繁花照蓮府
上略儒風並者稀

翩翩駟騎有光輝
只今左職多虛位
應待他時仗節歸

和李中丞慈恩寺清上人院牡丹花歌

淡蕩韶光三月中
牡丹偏自占春風
時過寶地尋香徑

已見新花出故叢
曲水亭西杏園北
濃芳深院紅霞色
擢色全勝珠樹林
結根幸在青蓮域
艷蕊仙房次第開
含煙洗露照蒼苔
龐眉倚杖禪僧起
雙翅縈枝舞蝶來
獨坐南臺時共美
閒行古刹情何已
花間一曲奏陽春
應為芬芬比君子

初秋月夜直宿因呈楊閣老

欵枕直廬暇風蟬迎
早秋沈沈玉堂夕
皎皎金波流對
掌喜新命分曹諧
舊遊相思玩華彩
因感庾公樓

蘇小小墓

萬木荒墳在悠然我獨尋寂寥紅粉盡冥漠黃泉深蔓
草暎寒水空郊曖夕陰風流有佳句吟眺一傷心

長相思

少小別潘郎嬌羞倚畫堂有時裁尺素無事約殘黃鵲
語臨妝鏡花飛落繡牀相思不解說明月照空房

國子柳博士兼領太常博士輒申賀贈

博士本秦官求才帖職難臨風曲臺淨對月璧池寒講

學分陰重齋詞曉漏殘朝衣辨色處雙綬更宜看

送人之九江

九派潯陽郡分明似畫圖秋光連瀑布晴翠辨香鑪才子厭蘭省邦君榮竹符江城多暇日能寄八行無

送鄭秀才貢舉

西上意如何知隨貢士科吟詩向月露驅馬出煙蘿晚色寒蕪遠秋聲候雁多自憐歸未得相送一勞歌

酬劉端公中秋對月見懷

涼夜清秋半空庭皓月圓
動搖隨積水皎潔滿晴天
多病佳期阻深情麗曲傳
偏懷賞心處同望庾樓前

奉陪李大夫九日龍沙宴會

龍沙重九會千騎駐旌旗
水木秋光淨絲桐雅奏遲
煙蕪歛暝色霜菊發寒姿
今日從公醉全勝落帽時

送映師歸本寺

還歸蕭寺去遠遠出人羣
苔甃桐花落山窓桂樹薰
引泉通絕澗放鶴入孤雲
幸許宗雷到清談不易聞

玉山嶺上作

悠悠駝匹馬征路上連岡晚翠深雲竇寒苔淨石梁荻
花偏似雪楓葉不禁霜愁見前程遠空郊下夕陽

呈衛端公

共嗟王粲滯荊州才子為郎憶舊遊涼夜偏宜華省入
清言遠待玉人酬風生北渚煙波濶露下南宮星漢秋
早晚得為同舍旅知君兩地結離憂

田家即事

閒卧藜牀對落暉
條然便覺世情非
漠漠稻花資旅食
青青荷葉製儒衣
山僧相勸期中飯
漁父同遊或夜歸
待學向平婚嫁畢
渚煙溪月共忘機

奉和太常韋卿閣老左藏庫藏假山之什

春山仙掌百花開
九棘腰金有上才
忽向庭中摹峻極
如從洞裏見昭回
小松已負干霄壯
片石皆疑縮地來
都內今朝似方外
仍傳麗句寄雲臺

陪崔閣老張祕監苗考功同遊昊天觀

方駕遊何許仙源去似歸縈迴留勝賞瀟灑出塵機泛
菊賢人至燒丹蛇女飛步虛清晚籟隱几吸晨輝竹徑
琅玕合芝田沆瀣晞銀鈎三洞字瑤笥六銖衣麗句翻
紅藥佳期限紫薇徒然一相望郢曲和應稀

與沈十九拾遺同遊栖霞寺上方夜於亮上人

院會宿

偶來人境外心賞幸隨君古殿煙霞夕深山松柏薰巖
花點寒溜石磴掃春雲清淨諸天近喧塵下界分名僧

康寶月上客沈休文共宿東林夜清猿徹曙聞

玉臺體

萬里行人至深閨夜未眠雙眉燈下掃不待鏡臺前
嶺上逢久別者又別

十年曾一別征旆此相逢馬首向何處夕陽千萬峰
江行夜詠

猿聲到枕上愁夢紛難理寂寂深夜寒清霜落秋水

曉

曉風搖五兩殘月映石壁稍稍曙光開片帆在空碧

宮人斜

一路斜分古驛前陰風切切晦秋烟鉛華新舊共冥漠
日暮愁鴉飛野田

舟行夜泊

蕭蕭落葉送殘秋寂寞寒波急暝流今夜不知何處泊
斷猿晴月引孤舟

贈天竺靈隱二寺主

石路泉流兩寺分
尋常鐘磬隔山聞
山僧半在中峰住
共占清猿與白雲

題柳郎中故居

下馬荒階日欲曛
潺潺石溜靜中聞
鳥啼花落人聲絕
寂寞山窓掩白雲

題雲師山房

雲公蘭若深山裏
月明松殿微風起
試問空門清淨心
蓮花不省秋潭水

朝元閣

繚垣複道上層霄
十里離宮萬國朝
胡馬忽來清蹕去
空餘臺殿照山椒

石倉歷代詩選卷六十六

欽定四庫全書

石倉歷代詩選卷六十七

明 曹學佺 編

中唐二十一

武元衡

字伯蒼
河南人

古意

蜀國春與秋岷江朝夕流長波東接海萬里至揚州開
門面淮甸楚俗饒歡宴舞榭黃金梯歌樓白雲面蕩子

未言歸池塘月如練

塞下曲

草枯馬蹄輕角弓勁如石
驕虜初欲來風塵暗南國
走檄召都尉星火勦羌狄
吾身許報主何暇避鋒鏑
白露深鐵衣半夜待攻擊
龍沙早立勛名向燕然勒

獨不見

荆門一柱觀楚國三休殿
環珮儼神仙輝光生顧盼
春風細腰舞明月高堂宴
夢澤水連雲渚宮花似霰
俄驚

白日晚始悟炎涼變別鳧異波濤離鴻分海縣南北斷
相聞嘆嗟獨不見

旬假南亭寄熊郎中

旬休屏戎事涼風北窻眠江城一夜雨萬里繞山川草
木散幽氣池塘鳴早蟬妍芳落春後旅思生秋前紅槿
燦庭艷綠蒲繁渚煙行歌獨謠酌坐撥朱絲絃哀玉不
可叩華觴徒湛然聞君東林卧郡閣曠周旋酬對龍象
侶灌注清泠泉如何無礙智猶苦病纏牽

送唐次

都門去馬嘶灞水春流淺青槐驛路長白日離樽晚望
望煙景微草色行人遠

晨興寄贈何使君

江陵歲方晏晨起盼庭柯白露傷紅葉清風斷綠蘿狗
時真氣索念遠懷憂多夙昔樂山意縱橫南浦波有美
嬋娟子百慮攢雙蛾絨情鬱不舒幽竹駢復羅為子歌
苦寒把酒朱顏酡世事浮雲變功名將如何

秋日對酒

行年過始衰，秋至獨先悲。
事往憐神魄，感深滋涕洟。
百慮紛然在，一醉兀無思。
寶瑟拂塵匣，徽音凝朱絲。
幽圃蕙蘭氣，煙窗松桂枝。
我乏濟時略，仗節撫坤維。
山川大兵後，牢落空城池。
沙猶振野綠，草生荒陂物。
變風雨順人懷，天地慈春耕。
事秋戰戎馬，去封陞波瀾。
暗超忽，堅白亦磷緇。
客有自嵩穎，重徵棲隱期。
丹訣學仙晚，白雲歸谷遲。
君恩不可報，霜露繞南枝。

安邑里中秋懷寄高員外

原憲素非貧嵇康自寡欲守道識通窮達命齊榮辱庭
柯變葱蒨籬菊揚芳馥墜葉翻夕霜高堂瞬華燭况茲
寒夜永復嘆流年促感物思殷勤懷賢心躑躅雄詞封
禪草麗句陽春曲高德十年兄異才千里足咫尺邈雪
霜相望如瓊玉欲識歲寒心松筠更秋綠

望夫石

佳人望夫處苔蘚封孤石萬里水連天巴江暮雲碧湘

妃泣下竹成斑子規夜啼紅樹白

行路難

君不見道傍廢井開野花原是昔年驕貴家幾度美人
來照影濯纈笑引銀瓶綆風飄雨散今奈何繡闥雕甍綠
苔多笙歌鼎沸君莫矜豪奢未必長多金行路難路難
不在九折灣

桃源行送友

武陵川徑入幽遐中有雞犬秦人家家傍流水盛桃花

桃花兩邊種來久溪流一道何時有垂條落蓋暗春風
夾岼芳菲至山口歲歲年年能寂寥林下青苔日為厚
時有仙鳥來啣花曾無世人此攜手可憐不知若為名
君往從之多所更古驛荒橋平路盡崩湍怪石小溪行
相見維舟登覽處紅堤綠岸宛然成多君此去從仙隱
令人晚節悔營營

長安敘懷寄崔十五

延首直城西花飛綠草齊迢遙隔山水悵望思遊子百

轉黃鸝細雨中千條翠柳衡門裏門對長安九陌路愁
心不惜芳菲度風塵冉冉秋復春鐘鼓喧喧朝復暮漢
家宮闕在中天紫陌朝臣車馬連蕭蕭霓旌合仙仗悠
悠劍佩入爐煙李廣少時思報國終軍未遇敢論邊無
媒守儒行榮悴紛相映家甚長卿貧身多公幹病不知
身病竟如何懶向青山眠薜蘿雞黍空多元伯惠琴書
不見子猷過超名累歲與君同自歎還隨鷓退風聞說
唐生子孫在何當一為問文通

兵行褒斜谷作

古地坼龜沙邊風送征雁霜明草正腓峰逼日易晏集
旅布嵌谷驅車歷層澗岷河源涉艱蜀甸遲行慣矢橐
劔室領孤軍沔陽盜賊譁無算疾謀奏凱抵甘泉還令
提兵防石坂

西亭早秋送徐員外

鼎鉉辭台座麾幢領益州曲池連月曉橫角滿城秋有
美皇華使曾同白社遊今年重相見偏覺艷歌愁

元和癸巳余領蜀之七年奉詔徵還二月二十
八日清明途經百牢關因題石門洞

昔佩兵符去今持相印還天光臨井絡春物度巴山鳥
道青冥外風泉洞壑間何慙班定遠辛苦玉門關

夕次嶠山下

南國獨行日三巴春草齊漾波歸海疾危棧入雲迷綿
谷嵐煙裏刀州晚照西旅情方浩蕩蜀魄滿林啼

送陸書記還吳

君住包山下何年入帝鄉成名歸舊業嘆別見秋光橘
袖吳洲遠蘆花楚水長我行經此路京口向雲陽

酬韓弇歸崖見寄

惆悵人間事東山遂獨遊露凝瑤草晚魚戲石潭秋軒
冕應相待煙霞莫遽留君看仲連意功立始滄洲

送李正字之蜀

已獻甘泉賦仍登片玉科漢官新組綬蜀國舊煙蘿劔
壁秋雲斷巴江夜月多無窮別離思遙寄竹枝歌

四川使宅有韋令公時孔雀存焉暇日與諸公
同翫座中兼故府賓妓興嗟久之因賦此詩
荀令昔居此故巢留越禽動搖金翠尾飛舞碧梧陰上
客撫瑤瑟佳人傷蕙心知因南國使得放海雲深

津梁寺採新茶與幕中諸公遍賞芳香尤異因
題四韻兼呈陸郎中

靈州碧巖下萹茶初散芳塗塗猶宿露采采不盈筐陰
竇藏煙濕單衣染焙香幸將調鼎味一為奏明光

送徐員外還京

九折朱輪動三巴
白露生蕙蘭秋意晚
闕塞別魂驚寶瑟
連宵怨金壘向月傾
旄頭星未落分手轆轤鳴

秋思

秋空浩煙霧風柳怨寒蛸
機杼夜聲切蕙蘭芳意消
美人湘水曲桂檝洞庭遙
常恐時光謝蹉跎紅艷凋

夏日別盧太卿

漢水清且廣江波渺復深
葉舟煙雨夜之子別離心
汀

草結春怨，山雲連暝陰。年年南北淚，今古共沾襟。

八月十五夜錦樓望月得中字

玉輪初滿空，迥出錦城東。相向秦樓鏡，分陰碣石鴻。桂香隨窈窕，珠綴隔玲瓏。不及明秋月，圓輝鳳沼中。

春夜與諸公同宴呈陸三十四郎中

南國宴佳賓，交情老倍親。月慙紅燭淚，花笑白頭人。寶瑟常餘怨，瓊枝不讓春。更聞歌子夜，桃李艷妝新。

送冠侍郎司馬之明州

斗酒上河梁驚魂去越鄉地窮滄海濶雲入剡山長蓮
唱蒲魚熟人煙橘柚香蘭亭應駐楫今古共風光

長安春望

宿雨淨煙霞春風綻百花綠楊中禁路朱戟五侯家草
色金隄晚鶯聲御柳斜無媒猶未達應共惜年華

經嚴秘校維故宅

掩淚山陽宅生涯此路窮香銷芸閣閉星落草堂空麗
藻浮名裏哀聲夕照中不堪投釣處鄰笛怨春風

長安秋夜懷陳京昆季

鐘鼓九衢絕出門千里同遠情高枕夜秋思北窗空靜
見煙凝燭閒聽葉墜桐玉壺思洞徹瓊樹憶青蔥螢影
疎簾外鴻聲暗雨中羈愁難會面懶慢責微躬甲乙科
攀桂圖書閣踐蓬一瓢非可樂六鷁未因風寥落悲秋
盡蹉跎惜歲窮明朝不相見流淚菊花叢

酬嚴維秋夜見寄

遙夜思悠悠聞鐘遠夢休亂林螢燭暗零露竹風秋啟

戶雲歸棟褰簾月上鉤
昭明逢聖代羈旅別滄洲
騎省潘郎思衡門
宋玉愁神仙慙李郭
詞賦謝曹劉
松柏應無變
瑤瑤不可酬
誰堪此時景
寂寞下高樓

歸燕

春色遍芳菲
閒簷雙燕歸
還同舊侶至
來遶故巢飛
敢望煙霄達
多慙羽翮微
啣泥傍金砌
拾葢到荆扉
雲海經時別
雕梁長日依
主人能一顧
轉盼自光輝

送許著作分司東都

瑤瑟激悽響征鴻翻夕陽署分刊竹簡書蠹護芸香馬
色關城曉蟬聲驛路長石渠榮正禮蘭室重元方不作
經年別離魂亦暫傷

聞相公三兄小園置宴以元衡寓直因寄上兼
呈中書三兄

休沐限中禁家山傳勝遊露寒潘省夜木落庾園秋蘭
菊迴幽步壺觴洽舊儔位高天祿閣詞異畔牢愁孤思
琴先覺馳暉水競流明朝不相見清祀在園丘

秋懷奉寄朱補闕

上苑繁霜降，騷人起恨初。
白雲深陋巷，衰草遍閒居。
暮色秋煙重，寒聲牖葉虛。
潘生秋思苦，陶令世情疎。
已製歸田賦，猶陳諫獵書。
不知青瑣客，投分竟何如。

送崔判官使太原

勞君車馬此逡巡，我與劉君本世親。
兩地山河分節制，十年京洛共風塵。
笙歌幾處胡天月，羅綺長留蜀國春。
報主末由須盡敵，煙塵萬里寶刀新。

酬嚴司空荆南見寄

金貂再領三公府，玉帳連封萬戶侯。
簾捲青山巫峽曉，煙開碧樹渚宮秋。
劉琨坐嘯風清塞，謝朓題詩月滿樓。
白雪調高歌不得，美人南望翠蛾愁。

南徐別業早春有懷

生涯擾擾竟何成，自愛深居隱姓名。
遠雁臨空翻夕照，殘雲帶雨過春城。
花枝入戶猶含潤，泉水侵階乍有聲。
虛度年華不相見，離腸懷土併關情。

送温况遊蜀

遊人西去客三巴
身逐孤蓬不定家
山近峨眉飛暮雨
江連濯錦起朝霞
雲深九折刀州遠
路繞千巖劔閣斜
因到嚴君開卦處
將余一為問生涯

春題龍門香山寺

衆香天上梵仙宮
鐘磬寥寥半碧空
清景乍開松嶺月
亂流長響石樓風
山河杳映春雲外
城闕參差曉樹中
欲盡出尋那可得
三千世界本無窮

送田三端公還鄂州

孤雲迢遞戀滄洲，勸酒梨花對白頭。
南陌送歸車騎合，東城怨別管絃愁。
青油幕裏人如玉，黃鶴樓中月並鉤。
君去庾公應借問，馳心千里大江流。

同幕中諸公送李侍御歸朝

昔年專席奉清朝，今日持書即舊僚。
珠履會中仙管思，白雲歸處帝鄉遙。
巴江暮雨連三峽，劔壁危梁上九霄。
歲月不堪相送盡，頽顏更被別離凋。

崔敷嘆春物將謝恨不同覽時余方為事牽求
及往尋不遇因題留贈

九陌遲遲麗景斜禁街西訪隱淪賒門依高柳空飛絮
身逐閒雲不在家軒冕強然趨世路琴樽空自負年華
殘陽寂寞東城曲惆悵春風落盡花

秋燈對雨寄史近崔積

坐聽宮城傳晚漏起看衰葉下寒枝空庭綠草閒行處
細雨黃花獨對時蟋蟀已驚涼節至茱萸空憶故人期

相逢莫厭樽前醉，春去秋來總不知。

夏夜作

夜久喧暫息，池臺惟月明。無因駐清景，日出事還生。

同陳侍御寒食遊禪藏山上人院

年少輕行樂，東城南陌頭。與君寂寞意，共作草堂遊。

鄂渚送友

雲帆淼淼巴陵渡，煙樹蒼蒼郢城江。上梅花無數落。

送君南浦不勝情。

宿青陽驛

空山遙落三秋暮
螢過疎簾月露團
寂寞銀燈愁不寐
蕭蕭風竹夜窗寒

題嘉陵驛

悠悠風旆繞山川
山驛空濛雨似煙
路半嘉陵頭已白
蜀門西上更青天

山居

方依泉壑將時背
路入煙蘿得地深
終歲不知城郭事

手栽林竹盡成陰

春齋夜雨憶郭通微

桃源在在阻風塵
世事悠悠又遇春
雨滴閒堦清夜久
焚香偏憶白雲人

陌上春暮

青青南陌柳如絲
柳色鶯聲晚日遲
何處最傷遊客思
春風三月落花時

春日偶作

飛花寂寂燕雙雙南客衡門對楚江惆悵管絃何處發
春風吹到讀書窗

歲暮送舍人

邊城歲暮望鄉關方逐戎旌未得還欲別臨岐無限淚
故園花發寄君攀

酬秦起居西亭留題

艷歌能起關山恨紅燭遙凝邊塞情況是池塘風雨夜
不堪絃管盡離聲

重送盧三十一起居

相如擁傳有光輝
何事闌干淚濕衣
舊府東山餘妓在
重將歌舞送君歸

送嚴秀才赴舉

灞澨別離腸已斷
江山迢遞信仍稀
送君偏下臨岐淚
家在南州身未歸

送柳郎中裴起居

秦人昔上望鄉臺
學射山中杜魄哀
落日河橋千騎別

春風寂寞旆旌迴

重送魏正則擢第歸江陵

高山路接玉山深
古木蒼然盡合陰
會府登筵君最少
江城秋至肯驚心

登闔閭古城

登高望遠自傷情
柳發花開映古城
全盛已隨流水去
黃鸝空轉舊春聲

渡淮

暮濤凝雪長淮水
細雨飛梅五月天
行子不須愁夜泊
綠楊多處有人煙

夏日寄陸三達陸四逢并王念八仲周

士衡兄弟舊齊名
還似當年在洛城
聞說重門方隱几
古槐高柳夏陰清

秋原寓目

木落風高天宇開
秋原一望思悠悠
哉邊城今少射雕騎
鴻雁嗷嗷何處來

汴河聞笳

何處金笳月下悲
悠悠遠客夢先知
單于城上關山曲
今日中原總解吹

和李丞題李將軍林園

落英飄葢雪紛紛
啼鳥如悲霍冠軍
逝水不迴絃管絕
玉樓迢遞鎖浮雲

羊士諤

泰山人

息舟荆溪入陽羨
南山遊善權寺呈李功曹

結纜蘭香渚柴車上連崗晏溫值初霽去遠山河長獻
歲朔雪盡細泉生路傍行披煙杉入激澗橫石梁層閣
表精廬飛薨切雲翔冲襟得高步清眺極遠方潭嶂積
佳氣萸英多早芳具觀澤國秀重使春心傷念遵煩促
途榮利驚隙光勉君脫冠意共匿無何鄉

九月十日郡樓獨酌

掾吏當授衣郡中稀物役嘉辰悵已失殘菊誰為惜當
軒一樽泛天景洞虛碧暮節獨賞心寒江鳴湍石歸期

北州里舊友東山客飄蕩雲海深相思桂花白

題枇杷樹

珍樹寒始花氤氳九秋月佳期若有待芳意常無絕
嫋嫋碧海風濛濛綠枝雪急景自餘妍春禽幸流悅

小園春至偶呈吏部竇郎中

松篠雖苦節冰霜慘其間欣然發佳色如喜東風還幽
抱想前躅冥鴻度南山春臺一以眺達士亦解顏偃息
非老圃沈吟悶玄關馳暉忽復失壯歲不得閒君子當

濟物丹梯誰共攀
心期自有約去掃蒼苔斑

乾元初嚴黃門自京兆少尹牧巴郡長才英氣
因多暇日每遊郡之東山山側精舍有盤石
細泉疏為流杯之勝苔深樹老蒼然遺躅士
諤謬因出守得繼茲賞

石座雙峰古雲泉
九曲深寂寥疏鑿意蕪沒歲時侵遶
席流還壅浮杯咽復沈
追懷王謝侶更似會稽岑
誰謂天池翼相期澤畔吟
光輝輕尺璧然諾重黃金
幾醉東山

妓長懸北闕心蕙蘭留雜佩桃李想華簪閑閣余何事
鳴騶亦屢尋軒裳遵往轍風景憇中林橫吹多淒調安
歌送好音初筵方側弁故老忽沾襟盛世當弘濟平生
諒所欽無能愧陳力惆悵拂瑤琴

早春對雨

南館垂楊早東風細雨頻輕寒消玉笋幽賞滯朱輪千
里巴江守三年故國春含情非遜客懸榻但生塵

永寧小園即事

蕭條梧竹下秋物映園廬宿雨方燃桂朝饑更摘蔬陰
苔生白石時菊覆清渠陳跡當何事忘言愧道書

登樂遊原寄司封孟郎中盧補闕

爽節特清眈秋懷悵獨過神臯值宿雨曲水已增波白
鳥臨風過紅蕖濯露多伊川有歸思君子復如何

暇日適值澄霄江亭遊宴

碧落風如洗清光鏡不分絃歌方對酒山谷盡無雲卧
向淮陽病悲同宋玉文今來強攜妓醉舞石榴裙

雨中寒食

令節逢煙雨園亭但掩關佳人宿妝薄芳樹綵繩閒歸
思偏消酒春寒為近山花枝不可見別恨灞陵間

寒食宴城北山池即故郡守滎陽鄭綱自為折

柳亭

別館青山郭遊人折柳行落花經上已細雨帶清明鶉
鳩流芳暗鴛鴦曲水平歸心何處醉寶瑟有餘聲

間齋示一二道者

幽蘭誰復奏，閉匣以端憂。知止慙先覺，歸餘想故侯。山
蟬鈴閣晚，江雨麥田秋。惟有空門學，相期老一丘。

在郡三年，今秋見白髮，聊以書事。

二毛非騎省，朝鏡忽秋風。絲縷寒衣上，霜華舊簡中。承
明那足厭，車服愧無功。日日山城守，淹留豈桂叢。

玩槿花

何乃詩人興，妍詞屬舜華。風流感異代，窈窕比同車。凝
艷垂清露，驚秋隔絳紗。蟬鳴復蟲思，惆悵竹陰斜。

臘夜對酒

琥珀盃中物瓊枝席上人
樂聲方醉客燭影已含春
自顧行將老何辭坐達晨
傳觴稱厚德不問吐車茵

永寧里園亭休沐悵然成詠

雲景含初夏休歸曲陌深
幽簾宜永日珍樹始清陰
遲客惟長簟忘言有匣琴
畫披靈物態書見古人心
芳草多留步鮮飈自滿襟
勞形非好事瀟洒愧頭簪

題郡南山光福寺寺即嚴黃門所置時自給事

中京兆少尹出守年三十性樂山水故老云
每旬數至後分閩西川州門有去思碑即却
拾遺之詞也

傳聞黃閣守茲地賦長沙少壯稱時傑功名惜歲華巖
廊初見剝賓從亟鳴笳玉帳空嚴道甘棠見野花碑殘
猶墮淚城古自歸鴉寂寂清風在懷人諒不遐

郡中即事

曉風山郭雁飛初霜拂回塘水榭虛鼓角清明如戰壘

梧桐搖落似貧居青門遠憶中人產白首閒看太史書
城下秋江寒見底賓筵休訝食無魚

遊郭駙馬大安山池

馬嘶芳草自淹留別館何人屬細侯仙杏破顏逢醉客
綵鴛飛去避行舟洞簫日煖移賓榻垂柳風多掩妓樓
坐閱清暉不知暮煙橫北渚水悠悠

郡中言懷寄西川蕭員外

功名無力愧勤王已近終南得草堂身外盡歸天竺偈

腰間惟有會稽章何時臘酒逢山客可惜梅枝亞石牀
歲晚我知仙客意懸心應在白雲鄉

臺中寓直晨覽蕭侍御壁畫山水

蟲思庭莎白露天微風吹竹曉淒然今來始悟朝迴客
暗寫歸心向石泉

過二鄉望女儿山早歲有卜築之志

女儿山頭春雪消路傍仙杏發柔條心期欲去知何日
惆悵回車上野橋

和李都官郎中經宮人斜

翡翠無窮掩夜泉
猶疑一半作神仙
秋來還照長門月
珠露寒花是野田

郡舍二首

紅衣落盡暗香殘
葉上秋光白露寒
越女含情已無限
莫教長袖倚闌干

登臨何事見瓊枝
白露寒花自遶籬
惟有樓中好山色
稻畦殘水入秋池

遊西山蘭若

路傍垂柳古今情
春草春泉咽又生
借問山僧好風景
看花攜酒幾人行

春望

莫問華簪髮已斑
歸心滿目是青山
獨上層樓倚危檻
柳營春盡馬嘶閑

寄江陵韓少尹

別來玄髮共成霜
雲起無心出帝鄉
蜀國魚箋數行字

憶君秋夢過南塘

彭州蕭使君出妓夜宴見送

玉顏紅燭忽驚春
微步凌波暗拂塵
自是當歌斂眉黛
不應惆悵為行人

客有自渠州來說常諫議使君故事
悵然成詠
才子長沙暫左遷
能將意氣慰當年
至今猶有東山妓
長使歌詩被管絃

憶江南舊遊

山陰道上桂花初
王謝風流滿晉書
曾作江南步從事
秋來還復憶鱸魚

賀州宴行營回將


几劔盈庭酒滿卮
戍人歸日及瓜時
元戎靜鎮無邊事
盡遣營中偃畫旗

泛後溪

雨餘芳草淨沙塵
水綠灘平色帶春
惟有啼鶉似留客
桃花深處更無人

永寧里小園與沈校書接近悵然題寄

故里心期奈別何
手移芳樹憶庭柯
東臯黍熟君應醉
梨葉初紅白露多



石倉歷代詩選卷六十七